

REGIONAL NEWS UNIT
ALL INDIA RADIO, AGARTALA
Date: 25-06-2024
Time: 07.35-07.40 AM Hrs
BENGALI MORNING BULLETIN

.....

Panchayat-Final voter list :

রাজ্যে আসন্ন ত্রিস্তরীয় পঞ্চায়েত নির্বাচনের জন্য চূড়ান্ত ভোটার তালিকা গতকাল প্রকাশিত হয়েছে। রাজ্য নির্বাচন কমিশন রাজ্যের ত্রিস্তরীয় পঞ্চায়েত নির্বাচনের জন্য আনুষ্ঠানিক সব ধরনের প্রস্তুতি নিতে শুরু করেছে। এই নির্বাচনে ৬ হাজার নয়শোর ও বেশি আসনে ভোট গ্রহণের কথা রয়েছে। এরমধ্যে আটটি জিলা পরিষদে আসন রয়েছে ১১৬টি, পয়ত্রিশটি পঞ্চায়েত সমিতিতে আসন ৪২৩টি এবং ৬০৬টি গ্রাম পঞ্চায়েতে মোট আসন রয়েছে ৬৩৭১টি।

Final Voter List :

খোয়াই ব্লকে আসন্ন পঞ্চায়েত নির্বাচনকে সামনে রেখে চূড়ান্ত ভোটার তালিকা গতকাল প্রকাশিত হয়েছে। খোয়াই ব্লকের ২৫ টি পঞ্চায়েতের মোট ভোটার ৪৮ হাজার ৬২০ জন। এরমধ্যে পুরুষ ভোটার ২৪ হাজার ৬১৪ জন এবং মহিলা ভোটার ২৪ হাজার ৬ জন। চূড়ান্ত ভোটার তালিকা প্রকাশ উপলক্ষে এদিন সবকটি রাজনৈতিক দলের প্রতিনিধিরা উপস্থিত ছিলেন।

PM-Union Ministers takes oath :

অষ্টাদশ লোকসভার সদস্য হিসেবে গতকাল শপথ গ্রহণ করলেন প্রধানমন্ত্রী নরেন্দ্র মোদী। অষ্টাদশ লোকসভার অধিবেশন শুরু হলে, প্রধানমন্ত্রী নরেন্দ্র মোদীকে নিম্নকক্ষের সদস্য হিসেবে শপথবাক্য পাঠ করান প্রোটেম স্পিকার ভত্‌রুঁহরি মহতাব।

এর আগে অষ্টাদশ লোকসভার প্রথম অধিবেশন শুরুর পর প্রথমে প্রোটেম স্পিকার হিসেবে শপথ নেন ভত্‌রুঁহরি মহতাব। রাষ্ট্রপতি দ্রৌপদী মুর্মু তাঁকে শপথ বাক্য পাঠ করান। এরপর একে একে শপথ নেন নবনির্বাচিত সাংসদরা। প্রধানমন্ত্রীর পর শপথ নেন প্রতিরক্ষা মন্ত্রী রাজনাথ সিং, কেন্দ্রীয় স্বরাষ্ট্র ও সমবায় মন্ত্রী অমিত শাহ, নীতিন গড়করি ও অন্যান্য সদস্যরা। শপথ গ্রহণের এই প্রক্রিয়া আজও চলবে ।

উল্লেখ্য, আগামীকাল হবে লোকসভার নতুন অধ্যক্ষ নির্বাচন। বৃহস্পতিবার উভয় সভার যৌথ অধিবেশনে ভাষণ দেবেন রাষ্ট্রপতি দ্রৌপদী মুর্মু। সেদিনই শুরু হবে, রাজ্যসভার অধিবেশন। তেসরা জুলাই পর্যন্ত সংসদের অধিবেশন চলার কথা।

Humen Trafficking NIA :

ভারত-বাংলাদেশ সীমান্ত দিয়ে বাংলাদেশি নাগরিক ও রোহিঙ্গা শরণার্থী পাচারের ঘটনায় আরও আট অভিযুক্তের বিরুদ্ধে চার্জশিট দিয়েছে ভারতের জাতীয় তদন্ত সংস্থা (এনআইএ)।

গতকাল জলিল মিয়া, হান্নান মিয়া, পলাতক কাজল সরকার, অধীর দাস ও আনোয়ার হোসেন 'ওরফে মামা' নামে পরিচিতদের বিরুদ্ধে চার্জশিট জমা দিয়েছে। তারা সকলেই ত্রিপুরা থেকে মানব পাচারের চক্র চালাতো বলে উল্লেখ করা হয়।

Doctors Advice :

দেশের অন্যতম ল্যাপারোস্কোপিক এবং জেনারেল সার্জন বিশেষজ্ঞ হেমন্ত প্যাটেল বলেছেন, "অল্প বয়সীদের মধ্যে পাইলস, ফিস্টুলা এবং ফিশারের ঘটনা বাড়ছে, বিশেষত পুরুষদের মধ্যে। গত কয়েক বছরে এই রোগীদের সংখ্যা উল্লেখযোগ্যভাবে বৃদ্ধি পেয়েছে। তিনি তরুন প্রজন্মকে বিশেষত ১৮ থেকে ২৫ বছর বয়সী ছেলেমেয়েদের খাদ্যাভ্যাস পরিবর্তন বিশেষত fast food খাবার পরিহার করার পরামর্শ দেন।

Khowai-Death :

খোয়াই মহকুমার বাইজাল বাড়িস্থিত ঈশ্বরচন্দ্র পাড়ায় গতকাল বিদ্যুৎস্পৃষ্ট হয়ে ইলিন দেববর্মা নামে এক যুবকের মৃত্যু হয়েছে। পুলিশ জানিয়েছে, নিজ ঘরে বৈদ্যুতিক লাইনে সারাইয়ের কাজ করার সময় এই দুর্ঘটনাটি ঘটে। ইলিন দেববর্মার এই মর্মান্তিক মৃত্যুতে এলাকায় গভীর শোকের ছায়া নেমে আসে।

Maan Ki Baat :

তৃতীয়বারের মত প্রধানমন্ত্রীর পদে দায়িত্বভার গ্রহণের পর প্রধানমন্ত্রী নরেন্দ্র মোদী আগামী ৩০শে জুন আকাশবানীর মন-

কি-বাত অনুষ্ঠানে দেশ বিদেশের জনগণের সাথে মত বিনিময় করবেন। এটি হলো মন-কি-বাত অনুষ্ঠানের ১১১তম পর্ব। জনগণ মন কি বাতের জন্য ভাবনা-চিন্তা ও পরামর্শ টোল-ফ্রী ১৮০০-১১-৭৮০০ নম্বরে শেয়ার করতে পারেন। এছাড়া নরেন্দ্র মোদী অ্যাপ অথবা মাইগভ ওপেন ফোরামে জমা দিতে পারেন। আগামী ২৮শে জুন পর্যন্ত এইসব পরামর্শ গ্রহণ করা হবে।

CRICKET :

রাজ্যভিত্তিক সিনিয়র ক্রিকেটের আসরের প্লেট গ্রুপে সেমিফাইনালের লাইন আপ চূড়ান্ত হয়েছে। ২৬ জুন হবে আসরের দুটি সেমিফাইনাল। মেলাঘরের শহীদ কাজল ময়দানে 'এ' গ্রুপের চ্যাম্পিয়ন তেলিয়ামুড়া খেলবে 'বি' গ্রুপের রানার্স বিলোনীয়ার বিরুদ্ধে এবং শান্তিরবাজারের বাইখোরা স্কুল মাঠে 'বি' গ্রুপের চ্যাম্পিয়ন আমবাসা খেলবে 'এ' গ্রুপের রানার্স জিরানীয়ার বিরুদ্ধে। সেমিফাইনালের বিজয়ী দল ২৮ জুন ফাইনালে খেলবে। নির্ধারক ম্যাচটি হবে মেলাঘরের শহীদ কাজল ময়দানে।

PURA BLOCK FOOTBALL :

সুব্রত মুখার্জী কাপ ফুটবলের পুর ব্লকের সেরা হলো বোধজং স্কুল এবং বিদ্যাসাগর ইউএমবি স্কুল। গতকাল এ.ডি. নগর স্কুল মাঠে অনুষ্ঠিত হয় পুর ব্লকের অনূর্ধ্ব-১৭ বছরের আসর। এতে বালক বিভাগে ৫টি এবং বালিকা বিভাগে ২টি স্কুল অংশ নেয়। বালকদের ফাইনালে বোধজং স্কুল ১-০ গোলে পরাজিত করে এ.ডি. নগর স্কুলকে। বালিকাদের ম্যাচে বিদ্যাসাগর ইউ.এম.বি. স্কুল ৩-১ গোলে পরাজিত করে সাধুটিলা সি.এম.এস. স্কুলকে। পুর ব্লক স্কুল স্পোর্টস বোর্ডের সচিব অশোক কুমার পাল এখবর জানান।

Weather :

আবহাওয়ার পূর্বাভাসে জানানো হয়েছে, আজ আকাশ সাধারণত মেঘাচ্ছন্ন থাকবে। বজ্র বিদ্যুৎ সহ রাজ্যের কিছু অংশে বৃষ্টিপাতের সম্ভাবনা রয়েছে। গতকাল সর্বোচ্চ তাপমাত্রা ছিল ৩৫ ডিগ্রী এবং সর্বনিম্ন ২৮ ডিগ্রী সেলসিয়াস । দিনের সর্বোচ্চ তাপমাত্রা থাকতে পারে ৩৫.৫ ডিগ্রী সেলসিয়াস এবং সর্বনিম্ন তাপমাত্রা থাকতে পারে ২৭.৬ ডিগ্রী সেলসিয়াস । আপেক্ষিক আর্দ্রতার পরিমাণ সর্বোচ্চ ৯৫ শতাংশ এবং সর্বনিম্ন ৬০ শতাংশ।
